

# საქართველოს რეგიონების კონკურენტუნარიანობის ანალიზი

DOI - 10.36962/ecs105/4-5/2022-140

ზურა გამთენაძე  
თსუ დოქტორანტი

*კვლევა PHDF-21-446 განხორციელდა  
მოთა რუსთაველის საქართველოს ეროვნული  
სამეცნიერო ფონდის მხარდაჭერით.*

## რეზიუმე

გაანალიზებულია საქართველოს რეგიონების კონკურენტუნარიანობა. ანალიზი დაფუძნებულია ევროკავშირის მიერ მისი ნევრი ქვეყნების რეგიონების შედარებითი და აბსოლუტური კონკურენტული უპირატესობის მოდელზე, რომელიც ყოველ სამ წელიწადში ერთხელ ქვეყნდება. სტატიაში გამოყენებული ინდიკატორები ემთხვევა ევროკავშირის მოდელს, თუმცა, განსხვავება აღნიშნულ შემთხვევაში მხოლოდ ინდიკატორებში შემავალ ცვლადებშია. სტატიის შედეგად მიიღება საქართველოს რეგიონების კონკურენტული უპირატესობის, როგორც შედარებითი, ასევე აბსოლუტური შეფასების ქულები.

**საკვანძო სიტყვები:** საქართველოს რეგიონები, კონკურენტუნარიანობა, რეგიონული განვითარება, საჯარო პოლიტიკა, შედარებითი ანალიზი.

## შესავალი

თანამედროვე მსოფლიოში ეკონომიკური, სოციალური და პოლიტიკური ცვლილებების დინამიკა სულ უფრო მეტად ზრდის კონკურენციას როგორც კერძო, ასევე საჯარო სექტორში. ეს უკანასკნელი მკვეთრად გამოიხატება ქვეყნებს შორის ეკონომიკური კონკურენციის ზრდით, ქვეყნებს შიგნით კი ადგილობრივ დონეზე რეგიონული და მუნიციპალიტეტებს

შორის კონკურენციით. საერთაშორისო ორგანიზაციების პოლიტიკა და მიდგომა იცვლება იმ მიმართულებით, რომ სახელმწიფოებს დაეხმარონ ბიზნეს კლიმატის გაუმჯობესებაში, ინვესტიციების მოზიდვასა და კონკურენტუნარიანობის ზრდაში (Bristow 2005). გლობალიზაციის პროცესის პარალელურად ეროვნული ეკონომიკების შედარებითი მნიშვნელობა მცირდება, თუმცა, იზრდება რეგიონების ან რეგიონებისა და მუნიციპალიტეტების როლი. ამ უკანასკნელთა შორის კონკურენცია ძირითადად ინვესტიციებისთვის, ბუნებრივი, ადამიანური და სხვა მრავალი რესურსისთვის იზრდება. რეგიონების შემსწავლელ მეცნიერებებში დღეს ფართოდაა გავრცელებული ის მოსაზრება, რომ კონკურენცია მუნიციპალიტეტებს შორის სხვადასხვა მახასიათებლებს ეფუძნება, როგორიცაა მაგალითად, სანარმოებს შორის კონკურენცია, საერთაშორისო ასპარეზზე ცნობადობის გაზრდა და ა.შ. (Cheshire 2003).

წინამდებარე ნაშრომი აანალიზებს საქართველოს რეგიონების კონკურენტუნარიანობას. 2014 წლიდან, როდესაც „ადგილობრივი თვითმმართველობის კოდექსი“ იქნა მიღებული, მუნიციპალიტეტებს მრავალი შესაძლებლობა ჰქონდათ შედარებითი კონკურენტუნარიანობა მოეპოვებინათ - მოსახლეობის ცხოვრების დონე გაეუმჯობესებინათ და ეკონომიკურ-ფინანსურ თვითმყოფადობასთან ახლოს ყოფილიყვნენ. მუნიციპალიტეტებში მდგომარეობის გაუმჯობესება პირდაპირ აისახება რეგიონების კონკურენტუნარიანობაზე.

### **ლიტერატურის მიმოხილვა**

საქართველოს მუნიციპალიტეტების მიერ საკუთარი ეკონომიკური უფლებამოსილებების რეალური შესაძლებლობების გამოყენება მნიშვნელოვანია თითოეული თვითმმართველობის, შესაბამისად, რეგიონების კონკურენტული განვითარებისთვის. მუნიციპალიტეტებს და რეგიონებს შორის კონკურენციის შედეგები გარკვეულწილად აისახება პირდაპირი უცხოური ინვესტიციების განაწილებაზე, რომელიც უმეტესად ქალაქ თბილისის მუნიციპალიტეტში მიდის და ეს განპირობებულია სხვა

რეგიონებთან და მუნიციპალიტეტებთან შედარებით უკეთესი ინფრასტრუქტურით, კვალიფიციური მუშახელის რაოდენობით, ბაზრის ზომით, ინტერნეტიზაციის დონით და სხვა მრავალი ფაქტორით (გამთენაძე 2021). თუმცა, ინვესტიციების მოცულობის ზრდა ერთმანეთთან კონკურენციაში მყოფი რეგიონების მხოლოდ ერთ-ერთი შედეგია და შედარებითი უპირატესობის მოპოვებისას სხვა, ზემოთ მოყვანილი შედეგებიც აშკარა ხდება - რაც უფრო იზრდება კონკურენტული უპირატესობა, მით უფრო მარტივი ხდება იმავე უპირატესობის განვითარება შემდგომ წლებშიც. აღნიშნული პროცესი გარკვეულ უთანასწორობას იწვევს თბილისსა და სხვა რეგიონებს შორის.

საქართველოს მუნიციპალიტეტების შედეგად, რეგიონების მიერ საკუთარი კონკურენტული უპირატესობის გაუმჯობესება რამდენიმე ძირითად ფაქტორზეა დამოკიდებული, თუმცა, მოცემულ შემთხვევაში მნიშვნელოვანია სამი ფაქტორი - ის საკუთარი უფლებამოსილებები, რომელიც „ადგილობრივი თვითმმართველობის კოდექსით“ არის განსაზღვრული, ეკონომიკური და ფინანსური თვითმყოფადობა და ადგილობრივი გადაწყვეტილების მიმღები პირების სურვილი, რომ ადგილობრივ დონეზე არსებული რესურსები მაქსიმალურად იქნას გამოყენებული და მუნიციპალიტეტმა შედარებით ან აბსოლუტურ უპირატესობას მიაღწიოს. მოცემულ ეტაპზე საქართველოს დეცენტრალიზაციის პოლიტიკა მხოლოდ მუნიციპალურ უფლებამოსილებებს მოიაზრებს, რაც რეგიონულ დონეზე პოლიტიკის მიღების საშუალებას გამორიცხავს. მიუხედავად იმისა, რომ „ადგილობრივი თვითმმართველობის კოდექსით“ მრავალი „ეკონომიკური უფლებამოსილება“ არაა განსაზღვრული, მუნიციპალიტეტებს აქვთ შესაძლებლობა ადგილობრივი მაცხოვრებლების დონე გააუმჯობესონ, ინვესტირებისთვის/მენარმეებისთვის მიმზიდველი გახადონ და სანაყის ეტაპზე ეკონომიკურ და ფინანსურ თვითმყოფადობას მიაღწიონ. ეს უკანასკნელი კი, როგორც ზემოთ აღინიშნა, დამატებით ბერკეტებს იძლევა შედარებითი უპირატესობის მოპოვებაში.

მუნიციპალური და რეგიონული კონკურენტუნარიანობის

ზრდა მჭიდროდაა დაკავშირებული ეკონომიკურ პოლიტიკასთან, რომელიც სამეწარმეო პროდუქტიულობისა და ცხოვრების დონის ზრდას პირდაპირ უწყობს ხელს (Martin and Sunley 2011). აღნიშნული ეკონომიკური პოლიტიკა კი ორი უმთავრესი მიმართულებისგან შედგება - რეგიონული ან მუნიციპალური განათლების სისტემის გაუმჯობესება და მოსახლეობის ხელმისაწვდომობა რესურსებზე. ორივე მიმართულება ეფუძნება „ქვემოდან-ზემოთ“ პრინციპს, რაც გულისხმობს მომხმარებლების (მოსახლეობის) შესაძლებლობების გაზრდას, რათა მათი მსყიდველუნარიანობა გაიზარდოს (Thornton, Ribeiro-Soriano and Urbano 2011). კონკურენციაში აბსოლუტური და არა შედარებითი უპირატესობის მოპოვების შემთხვევაში მუნიციპალიტეტი ან რეგიონი შედეგად იღებს ცხოვრების გაუმჯობესებულ დონეს, მეტ ინვესტიციას, მაღალი კვალიფიკაციის მქონე მოსახლეობის და საწარმოების მიგრაციას (Malecki 2004). შესაბამისად, კონკურენტული უპირატერობის მოპოვება კიდევ უფრო ზრდის მუნიციპალიტეტის ან რეგიონის კონკურენტუნარიანობას და აღნიშნული ორი პროცესი ერთმანეთთან ძლიერ კორელაციაშია. არანაკლებ მნიშვნელოვანია შექმნილი დოვლათის იმგვარი განაწილება, რაც კიდევ მეტ დოვლათს და შესაძლებლობას შექმნის რეგიონში, ვინაიდან წინასწარ განსაზღვრული, რამდენიმეწლიანი პოლიტიკის გარეშე, გარკვეულ ფაქტორებზე დამყარებული ცხოვრების დონის შემთხვევითი ზრდა კვლავ შემცირდება. შესაბამისად, მუნიციპალიტეტის ან რეგიონის კონკურენტუნარიანობის ზრდის შენარჩუნებაში მნიშვნელოვანია პროცესის მუდმივი კონტროლი და გრძელვადიანი განვითარების გეგმის შექმნა (Huggins, Izushi and Thompson 2013). აღნიშნული გეგმის შექმნა კი საქართველოში მხოლოდ მუნიციპალურ დონეზეა შესაძლებელი.

### **კვლევის მეთოდოლოგია**

წინამდებარე კვლევა დაფუძნებულია ევროპის რეგიონული კონკურენტუნარიანობის ინდექსის მოდელზე (Annoni and Dijkstra 2020). ევროკავშირი ყოველ სამ წელიწადში ერთხელ აქ-

ვეყნებს მისი წვერი ქვეყნების რეგიონების კონკურენტუნარიანობის შედეგებს. მოდელი დაფუძნებულია სამ ძირითად კატეგორიაზე - საბაზისოზე, ეფექტიანობასა და ინოვაციურობაზე. თითოეული კატეგორია მოიცავს რამდენიმე ინდიკატორს, ხოლო ინდიკატორები - რამდენიმე ცვლადს. სამ წელიწადში ერთხელ ცვლადების რეგიონული ცვლილება ყოველ ინდიკატორში ასახავს რეგიონის კონკურენტუნარიანობის ცვლილებას.

**ვერობის რეგიონული კონკურენტუნარიანობის  
ინდექსის ინდიკატორები**

| საბაზისო                     | ეფექტიანობა                     | ინოვაციურობა                       |
|------------------------------|---------------------------------|------------------------------------|
| ინსტიტუტები                  | უმალესი და პროფესიული განათლება | ტექნოლოგიური მზაობა                |
| მაკროეკონომიკური სტაბილურობა | შრომის ბაზრის ეფექტიანობა       | საწარმოების ტექნოლოგიური მდგრადობა |
| ინფრასტრუქტურა               | ბაზრის ზომა                     | ინოვაციები                         |
| ჯანდაცვა                     |                                 |                                    |
| საშუალო განათლება            |                                 |                                    |

თუმცა, ვინაიდან მუნიციპალურ და რეგიონულ დონეზე სამივე კატეგორიაში შემავალი ყველა ცვლადის შესახებ საქართველოს სტატისტიკის ეროვნული სამსახურის მიერ ინფორმაცია არ მოიპოვება, კონკურენტუნარიანობის შეფასების მოდელში გამოყენებული იქნება მხოლოდ ის ცვლადები, რომელიც არსებობს. პარალელურად, საქართველოს მუნიციპალური კონკურენტუნარიანობის შეფასებისას გამოყენებული იქნება

დამატებით სხვა ცვლადები, რომელიც გავლენას ახდენს ადგილობრივების ცხოვრების დონის გაუმჯობესებაში ან ინვესტიციებს ზრდას/მენარმოებას უწყობს ხელს.

**კვლევაში გამოყენებული ინდიკატორები**

| საბაზისო          | ეფექტიანობა                  | ინოვაციურობა          |
|-------------------|------------------------------|-----------------------|
| ინსტიტუტები       | შრომის ბაზრის<br>ეფექტიანობა | ინტერნეტის<br>დაფარვა |
| ეკონომიკა         | ბაზრის ზომა                  |                       |
| საშუალო განათლება | სანარმოების<br>პროდუქტიულობა |                       |

საქართველოს რეგიონების კონკურენტუნარიანობის ანალიზი მოიცავს მხოლოდ 2019 და 2020 წლებს. 2019 წელი COVID19 პანდემიამდელი შედეგების ჩვენების შესაძლებლობას იძლევა, ხოლო 2020 წელი სწორედ პანდემიით გამოწვეული ცვლილებების ასახვის საშუალებას მისცემს ანალიზს. თითოეულ ინდიკატორში გამოყენებულია ერთი ან რამდენიმე ცვლადი. ინდიკატორებში შემავალი ცვლადები შემდეგნაირია: ინსტიტუტები - მთის კანონის დაფარვის პროცენტულ მაჩვენებელს, რეგიონში არსებული მუნიციპალიტეტების განვითარების სტრატეგიების რაოდენობას, ინფორმაციის ხელმისაწვდომობას სერვისების შესახებ; ეკონომიკა - უძრავი ქონების საშუალო ფასს რეგიონში, მუნიციპალიტეტების საკუთარი შემოსავლების ზრდის საშუალო რეგიონულ მაჩვენებელს და რეგიონში ფულის მასის ბრუნვას; განათლება - რეგიონში არსებულ თითოეულ სკოლაში მოსწავლეების საშუალო რაოდენობას და რეგიონში არსებულ თითოეულ პროფესიულ კოლეჯში მოსწავლეების საშუალო რაოდენობას; შრომის ბაზრის ეფექტიანობა - რეგიონული მთლიანი შიდა პროდუქტის შეფარდება დასაქმე-

ბულთა რაოდენობასთან, გამოშვებული პროდუქცია დასაქმებულითა რაოდენობასთან; ბაზრის ზომა - დასაქმებულთა წილს 15-65 წლის ასაკობრივ ჯგუფში, საშუალო თვიურ ხელფასს რეგიონში; საწარმოების პროდუქტიულობა - პირდაპირი უცხოური ინვესტიციების შეფარდება დასაქმებულთა რაოდენობასთან, მცირე და საშუალო ზომის საწარმოების წილი მთლიან რეგიონულ ბრუნვაში; ტექნოლოგიები - ინტერნეტის დაფარვის რეგიონული მაჩვენებელი.

საქართველოს რეგიონების კონკურენტუნარიანობის შესაფასებლად გამოყენებული თითოეული გაანალიზებული იქნება z-სტატისტიკის (z-score) შეფასების მოდელით:

$$R_{vm} = \frac{V_m^t - \bar{V}_m^t}{\sigma_v^t}$$

სადაც:

$R_{vm}$  - რეგიონების მიერ კონკრეტული V ცვლადების ანალიზის შედეგად მიღებული R ქულაა;

$V_m^t$  - მოცემულ ინდიკატორებში კონკრეტულ ცვლადების მონაცემები, რომელიც m მუნიციპალიტეტს მოცემულ t წელს ჰქონდა;

$\bar{V}_m^t$  - მოცემულ ინდიკატორებში კონკრეტული ცვლადების საშუალო არითმეტიკული, რომელიც მუნიციპალიტეტებს ჰქონდათ მოცემულ t წელს;

$\sigma_v^t$  - სტანდარტული გადახრა.

რეგიონებს შორის კონკურენტუნარიანობის აბსოლუტური და შედარებითი უპირატესობების საჩვენებლად, მნიშვნელოვანი ნაწილია  $\bar{V}_m^t$  მონაცემის მნიშვნელობა. აბსოლუტური უპირატესობის გასაგებად, აღნიშნული მონაცემი იქნება 0-ის ტოლი, რომელსაც ევროკავშირი იყენებს რეგიონული კონკურენტუნარიანობის საჩვენებლად. შედარებითი უპირატესობისთვის კი მნიშვნელობა იქნება არითმეტიკული საშუალო. დამატებით, მნიშვნელოვანია გამოიყოს თბილისი - ერთ შემთხვევაში შედარება იქნება ყველა რეგიონს შორის, მათ შორის

თბილისი, ხოლო მეორე შემთხვევაში თბილისის გარეშე. საბოლოო ჯამში, ანალიზის შედეგად ოთხი შედეგის ჩვენება იქნება შესაძლებელი:

1. აბსოლუტური კონკურენტული უპირატესობა თბილისის ჩათვლით;
2. აბსოლუტური კონკურენტული უპირატესობა თბილისის გარეშე;
3. შედარებითი კონკურენტული უპირატესობა თბილისის ჩათვლით;
4. შედარებითი კონკურენტული უპირატესობა თბილისის გარეშე.

თითოეული შედეგი მოცემული იქნება ორი წლის ჭრილში - 2019 და 2020 წელს. აღნიშნული საშუალებას იძლევა კონკურენტუნარიანობაზე COVID-19 პანდემიის გავლენაც აისახოს. მონაცემები მოპოვებულია საქართველოს სტატისტიკის ეროვნული სამსახურის, მსოფლიო ბანკის, მსოფლიო სავალუტო ფონდისა და სხვა ვალიდური ონლაინ წყაროების მიერ. მონაცემები, რომლებიც არ მოიპოვება რეგიონულ დონეზე, მაგრამ მუნიციპალურზე - კი, დაჯამებულია და გამოყვანილია რეგიონის საშუალო სტატისტიკური მონაცემი.

### **კვლევის შედეგები**

აღნიშნულმა კვლევამ ემპირიულად აჩვენა, რომ თბილისი ყველაზე კონკურენტული რეგიონია მთელ საქართველოში, რომელმაც შედარებითი და აბსოლუტური კონკურენტული უპირატესობა პანდემიის ფონზეც შეინარჩუნა, თუმცა, შემცირდა. COVID-19-ით გამოწვეულმა პანდემიამ განსხვავებულად იმოქმედა საქართველოს რეგიონების კონკურენტუნარიანობაზე. მიუხედავად იმისა, რომ მთელ მსოფლიოში და მათ შორის საქართველოს საკმაოდ მკაცრი სოციალური და ეკონომიკური შეზღუდვები დაწესდა, ქვემო ქართლის, მცხეთა-მთიანეთის, შიდა ქართლის, სამცხე-ჯავახეთის, სამეგრელოსა და გურიის კონკურენტული უპირატესობები მცირედით გაიზარდა. შედარებითი და აბსოლუტური კონკურენტული უპირატესობების



ცვლილებები 2019-2020 წლებში მოცემულია ცხრილში სა-  
ქართველოს რეგიონების კონკურენტუნარიანობის ცხრილი  
(2019-2020 წლები). ცხრილში დეტალურად ჩანს თითოეული  
რეგიონის ქულა, რომელიც მინიჭებულია ევროკავშირის კო-  
ნკურენტუნარიანობის შეფასების მოდელის მიხედვით. ზოგადი  
ქულების მინიჭების პარალელურად მნიშვნელოვანია იმის ანა-  
ლიზიც, კონკრეტულად რომელი ინდიკატორი ან ინდიკატო-  
რები უფრო მოქმედებენ რეგიონული კონკურენტუნარიანობის  
ზრდაზე.

**საქართველოს რეგიონების კონკურენტუნარიანობის ცხრილი  
(2019-2020 წლები)**

|                              | შეფარებითი<br>კონკურენტუნარიანობა |                             | აბსოლუტური<br>კონკურენტუნარიანობა |                             | შეფარებითი<br>კონკურენტუნარიანობა |                             | აბსოლუტური<br>კონკურენტუნარიანობა |                             |
|------------------------------|-----------------------------------|-----------------------------|-----------------------------------|-----------------------------|-----------------------------------|-----------------------------|-----------------------------------|-----------------------------|
| რეგიონი                      | 2019                              | 2019<br>(თბილისის<br>გარდა) | 2019                              | 2019<br>(თბილისის<br>გარდა) | 2020                              | 2020<br>(თბილისის<br>გარდა) | 2020                              | 2020<br>(თბილისის<br>გარდა) |
| თბილისი                      | 1.43                              |                             | 2.99                              |                             | 1.34                              |                             | 2.88                              |                             |
| კახეთი                       | -0.02                             | 0.12                        | 1.54                              | 2.33                        | -0.04                             | 0.10                        | 1.50                              | 2.25                        |
| ქვემო<br>ქართლი              | 0.02                              | 0.48                        | 1.58                              | 2.69                        | 0.10                              | 0.63                        | 1.64                              | 2.78                        |
| მცხეთა-<br>მთიანეთი          | -0.44                             | -0.53                       | 1.12                              | 1.68                        | -0.42                             | -0.48                       | 1.12                              | 1.67                        |
| შიდა<br>ქართლი               | -0.33                             | -0.27                       | 1.23                              | 1.94                        | -0.29                             | -0.22                       | 1.25                              | 1.93                        |
| სამცხე-<br>ჯავახეთი          | -0.23                             | -0.19                       | 1.33                              | 2.02                        | -0.17                             | -0.17                       | 1.37                              | 1.97                        |
| იმერეთი                      | -0.15                             | 0.19                        | 1.41                              | 2.40                        | -0.20                             | 0.15                        | 1.34                              | 2.30                        |
| რაჭა,<br>ლეჩხუმი,<br>სვანეთი | -0.29                             | -0.53                       | 1.27                              | 1.68                        | -0.32                             | -0.60                       | 1.22                              | 1.55                        |
| სამეგრელო                    | 0.03                              | 0.26                        | 1.59                              | 2.47                        | 0.06                              | 0.31                        | 1.60                              | 2.46                        |
| გურია                        | -0.30                             | -0.47                       | 1.26                              | 1.74                        | -0.27                             | -0.45                       | 1.27                              | 1.69                        |
| აჭარა                        | 0.27                              | 0.95                        | 1.83                              | 3.16                        | 0.22                              | 0.74                        | 1.76                              | 2.89                        |

თბილისის შემთხვევაში ყველაზე მნიშვნელოვანი ინდიკატო-  
რები განათლება და ტექნოლოგიები აღმოჩნდა. სწორედ ამ ორს  
აქვს ყველაზე მეტი წილი თბილისის კონკურენტუნარიანობაში.  
სამეგრელოს, გურიისა და კახეთის რეგიონების კონკურენტუ-

ნარიანობას ყველაზე მეტად ზრდის ინსტიტუტები, კერძოდ, ინფორმაციის ხელმისაწვდომობა და ეკონომიკა, კერძოდ, მიწის ფასი. რაჭა, ლეჩხუმი და ქვემო სვანეთისა და მცხეთა-მთიანეთის რეგიონებში გამოირჩა მთის კანონის დაფარვის ცვლადი, ქვემო ქართლის, შიდა ქართლისა და იმერეთის რეგიონებში მცირე და საშუალო ზომის საწარმოების წილი მთლიან რეგიონულ ბრუნვაში ერთ-ერთი ყველაზე ძლიერი და გავლენიანი ცვლადია, სამცხე-ჯავახეთის რეგიონში მძლავრობს ბაზრის ზომისა და ბაზრის ეფექტიანობის ინდიკატორები მთლიანად, აჭარის რეგიონში თითქმის ყველა ინდიკატორს მეტნაკლებად მსგავსი გავლენა აქვთ კონკურენტუნარიანობაზე, თუმცა, ოდნავ მეტი წილი პირდაპირი უცხოური ინვესტიციების სიმჭიდროვესა და ბრუნვას აქვს. აღნიშნული ინდიკატორების გავლენა თითოეულ რეგიონზე ერთნაირად ძლიერ გავლენას იწარჩენებს, როგორც შედარებითი, ასევე აბსოლუტური კონკურენტუნარიანობის ანალიზისას. თუმცა, მცირედი განსხვავება შეინიშნება მაშინ, როდესაც ანალიზისას თბილისის მუნიციპალიტეტი არ არის გათვალისწინებული ანუ ყველა რეგიონი ერთმანეთთან შედარებულია, გარდა თბილისისას. აღნიშნულ შემთხვევაში ყველაზე მეტი კორელაციის მქონე ცვლადები ინფორმაციის ხელმისაწვდომობა, მიწის ფასი, მთის კანონის დაფარვა და ბაზრის ეფექტიანობაა.

მოცემულ შემთხვევაში რეგიონის კონკურენტუნარიანობის ზრდა პირდაპირ კავშირშია რეგიონში არსებული მუნიციპალიტეტების მიერ გატარებულ პოლიტიკაზე. როგორც ზემოთ აღინიშნა, საქართველოში დეცენტრალიზაცია ჯერჯერობით მხოლოდ მუნიციპალურ დონეზე მიმდინარეობს, თუმცა, რეგიონული დაჯგუფება ერთ-ერთი მნიშვნელოვანია ევროკავშირისა და დანარჩენი მსოფლიოს ინდიკატორებში.

## **დასკვნა**

წინამდებარე ნაშრომის შედეგად შესაძლებელია გარკვეული დასკვნების გაკეთება საქართველოს რეგიონების კონკურენტუნარიანობის შეფასების მხრივ. მოცემული შედეგების

გათვალისწინებით, თითოეული რეგიონის მუნიციპალიტეტს შეუძლია გარკვეულწილად გაითვალისწინოს ის ცვლადები, რომლებიც რეგიონზე ყველაზე მეტად ზემოქმედებს ან ზოგადად რა ინდიკატორებით ფასდება კონკურენტუნარიანობა ევროკავშირში და შემდგომი პოლიტიკა დაგეგმოს შესაბამისად. შედეგად, თუ რეგიონულ დონეზე მნიშვნელოვანია ევროკავშირთან შედარება, აუცილებელია მუნიციპალიტეტებმა დაგეგმონ საკუთარი განვითარება ემპირიული და ადგილობრივების საჭიროებებზე დაფუძნებული მიდგომით. დამატებით, აღნიშნული კვლევა საფუძველი იქნება შემდგომში მუნიციპალური კონკურენტუნარიანობის შესაფასებლად. ვინაიდან ამ ეტაპზე ნაკლებად მოიპოვება სტატისტიკური ინფორმაცია საქართველოს ადგილობრივი თვითმმართველობების შესახებ. თუმცა, არსებობს მოდელი და მოცემული სტატიის შექმნილია რეგიონული ანალიზიც, რაც არა მხოლოდ მუნიციპალური, არამედ სექტორული და კლასტერული კონკურენტუნარიანობის ანალიზსაც შეუწყობს ხელს.

#### **REFERENCES:**

1. Bristow, Gillian. 2005. „Everyone’s a “winner”: problematising the discourse of regional competitiveness.“ (Journal of Economic Geography) 5 (3): 285-304.
2. Cheshire, Paul Charles. 2003. „Territorial Competition: Lessons for (Innovation) Policy.“ Innovation Clusters and Interregional Competition-ში, Johannes Bröcker, Dirk Dohse და Rüdiger Soltwedel-ის მიერ, 331-346. Springer.
3. Malecki, Edward. 2004. „Joyckeing for position: What it Means and Why It Matters to Regional Development Policy When Places Compete.“ Regional Studies 38 (9): 1101-1120.
4. Gamtenadze, Z. 2021. „Analysis of Georgian Municipalities’ Investment Attractiveness“. Economics and Business 4 (2): 69-82. (გამთენაძე, ზურა. 2021. „საქართველოს რეგიონების საინვესტიციო მიმზიდველობის ანალიზი.“ ეკონომიკა და ბიზნესი 14 (2): 69-82.);

5. Annoni, Paola, და Lewis Dijkstra. 2020. European Regional Competitiveness Index 2019. Regional and Urban Policy.

6. Martin, Ron, და Peter Sunley. 2011. „Conceptualizing Cluster Evolution: Beyond the Life Cycle Model?“ Regional Studies 45 (10): 1299-1318.

7. Thornton, Patricia H., Domingo Ribeiro-Soriano, და David Urbano. 2011. „Socio-cultural factors and entrepreneurial activity: An overview.“ International Small Business Journal 29 (2): 105-118.

8. Huggins, Robert, Hiro Izushi, და Piers Thompson. 2013. „Regional Competitiveness: Theories and Methodologies for Empirical Analysis.“ The Business and Economics Research Journal 6 (2): 155-172.

## COMPETITIVENESS ANALYSIS OF THE REGIONS OF GEORGIA

**Zura Gamtenadze,**  
Ph.D. Student TSU

***This research PHDF-21-446 has been supported by Shota Rustaveli National Science Foundation of Georgia (SRNSFG)***

### RESUME

This article analyzes the competitiveness of the regions of Georgia. The analysis is based on the model of comparative and absolute competitive advantage of the EU member states' regions, which is published every three years. The indicators used in the article correspond to the EU model, however, the difference in this case is only in the variables included in the indicators of the research. As a result of the article, the ranking of comparative as well as absolute evaluation of the competitive advantage of the regions of Georgia will be obtained.

**Keywords:** Regions of Georgia, Competitiveness, Regional Development, Public Policy, Comparative Analysis.